

- प्रधानमंत्री नरेन्द्र मोदी जनजातीय गौरव दिवस रे मौके छह हजार छह सौ करोड़ रिप्यां सूँ बत्ता री विकास परियोजनावां री सुरूआत करी।
- गुरुनानक जयंती प्रकाश पर्व रा रूप मांय उच्छाव रे सागे मनायी जा रही है—गुरुद्वारां मांय शबद कीर्तन अर लंगर व्हे रह्या है।
- कार्तिक पूर्णिमा रे मौके पुष्कर समेत पवित्र तीरथां मांय दीपदान अर दान पुण्य रा कार्यक्रम।
- जयपुर मांय आज सूँ आयुर्वेद कुंभ "संयोजनम् 2024" री सुरूआत व्ही।

000

आज भगवान बिरसा मुंडा री जयंती है। यो दिन हर बरस 15 नवम्बर ने जनजातीय गौरव दिवस रा रूप मांय मनायो जावे है। राष्ट्रपति द्रौपदी मुर्मू इण मौके राष्ट्र ने संबोधित करता थका भगवान बिरसा मुंडा ने नमन कर्यो। राज्यपाल हरिभाऊ बागडे बिरसा मुंडा रा 150 वां जन्म जयंती बरस री सुरूआत री बधाई अर शुभकामनावां दी। श्री बागडे कह्या के जल, जंगल अर जमीन अर मातृभूमि माथे स्वराज रो संदेश देबा वाळा भगवान बिरसा मुंडा रा आदर्श म्हाकी धरोहर है। वे कह्या के बिरसा मुंडा जनजाति गौरव, जनजातीय संस्कृति, स्वाभिमान अर स्वतंत्रता ने बचाव खातर लगातार संघर्ष कर्या। ई मौके प्रदेश मांय धरती आबा जनजातीय ग्राम उत्कर्ष अभियान रे तैत केई कार्यक्रम कर्या जा रह्या है। बाड़मेर अर भीलवाड़ा मांय जिलास्तरीय जळसा राख र भगवान बिरसा मुंडा रा जनजातीय समुदाय खातर कर्या गया कामां ने याद कर्यो गयो।

000

प्रधानमंत्री नरेन्द्र मोदी कह्या के जनजातीय समुदायां खातर शिक्षा, उपचार अर रूजगार देणो सरकार रो पैलो काम है। प्रधानमंत्री जनजातीय गौरव दिवस माथे आज बिहार रा जमुई मांय छह हजार छह सौ करोड़ रिप्यां सूँ बत्ता री विकास परियोजनावां री सुरूआत करी अर नींव राखी। ई मौके प्रधानमंत्री कह्या के ईण परियोजनावां रो लगस जनजातीय समुदायां रा विकास अर गांवाई अर दूरदराज रा हलका मांय बुनियादी ढांचा मांय सुधार करणो है। श्री मोदी भगवान बिरसा मुंडा रा जीवन अर फली फूली आदिवासी विरासत अर संस्कृति माथे आधारित एक प्रदर्शनी रो भी उद्घाटन कर्या। ई मौके वे स्मारक सिक्का अर डाक टिकट भी जारी कर्या। प्रधानमंत्री दो जनजातीय स्वतंत्रता सेनानियां रा संग्रहालय अर दो जनजातीय अनुसंधान संस्थानां रो भी उद्घाटन कर्या। प्रधानमंत्री कह्या के वां री सरकार जनजातीय समुदाय री विरासत अर संस्कृति ने बचाव खातर कमर कस राखी है। जमुई मांय श्री मोदी कह्या के सरकार पी.एम. जनमन अर धरती आबा जनजातीय उत्कर्ष ग्राम अभियान सुरू कर्यो है।

प्रधानमंत्री जनजातीय समाज खातर इण भांत री पहल करबा खातर राष्ट्रपति द्रौपदी मुर्मू रो आभार जतायो। प्रधानमंत्री ई मौके आदिवासी बहुल जिला मांय बिरसा मुंडा गौरव उपवन सुरू करबा रो एलान कर्या। श्री मोदी कह्या के जनजातीय समुदाय री 20 लाख लखपति दीदियां ने सरकारी इमदाद दी गयी है। अठिने, प्रदेश रा न्यारा-न्यारा जिला मांय भी जनजातीय गौरव दिवस उच्छाव रे सागे मनायो गयो। जिला स्तर माथे राख्या कार्याक्रमां मांय प्रधानमंत्री रा संबोधन ने वर्चुअल रूप ऊं सुण्यो गयो। बांसवाड़ा मांय राख्या कार्यक्रम मांय मुख्यमंत्री भजनलाल शर्मा शामिल व्ह्या। वणा राष्ट्र री रक्षा खातर आदिवासी वीरां रा बलिदान ने याद करता थकां नमन कर्यो।

इण मौके मुख्यमंत्री आदिवासी समाज री 30 प्रतिभावां ने सम्मानित भी कर्या। चित्तौड़गढ़ मांय राख्या कार्यक्रम मांय सांसद सी.पी. जोशी समेत केई जन प्रतिनिधी मौजूद रह्या। इण दौरान आदिवासी समाज रा लोगां ने न्यारी-न्यारी योजनावां सूँ जोड़्यो ग्यो। ई मौके धरती आबा जनजातीय ग्राम उत्कर्ष अभियान री सुरूआत व्ही। इण रे तैत पाली री बाली पंचायत समिति मांय जिला स्तरीय कार्यक्रम मांय जनप्रतिनिधि अर आदिवासी समाज रा लोग भाग लीना। इण अभियान मांय जिला री 43 ग्राम पंचायतां ने शामिल कर्यो गयो है। इण पंचायतां मांय काल सूँ आवता दस दिन तांई शिविर राख्या जावेला। जैसलमेर, जालौर, भीलवाड़ा अर सवाईमाधोपुर समेत दूजा जिला मांय भी ग्राम उत्कर्ष अभियान सुरू व्ह्यो। कोटा मांय जनजातीय गौरव दिवस कार्यक्रम मांय चोखो प्रदर्शन करबा वाळा जनजातीय पढनियां ने सम्मानित कर्यो गयो।

गुरुनानक जयंती ने प्रकाश पर्व रा रूप मांय आज देश भर मांय उच्छाव रे सागे मनायो जा रह्यो है। इण मौके प्रधानमंत्री नरेंद्र मोदी आप रा संदेश मांय गुरु नानक देव जयंती री शुभकामनावां देता थका कह्या के नानक देव जी री शिक्षावां लोगां मांय, दया, प्रेम अर आदर री भावना ने बढ़बा रो संदेश देवे है। मुख्यमंत्री भजनलाल शर्मा कह्या के गुरुनानक देव जी री शिक्षावां री पालना करता थकां सेवा, सामाजिक समानता, नैतिक ईमानदारी अर पर्यावरण संरक्षण राज्य सरकार रो पैलो काम है। प्रकाश पर्व रे मौके राजधानी जयपुर समेत प्रदेश रा सगळा छोटा बडा गुरुद्वारा मांय शबद कीर्तन अर लंगर राख्या जा रह्या है। भरतपुर रा पाईबाग रा गुरुद्वारा मांय गुरुवाणी रा पाठ अर लंगर बरता जा रह्या है। चूरू, सवाईमाधोपुर अर दौसा मांय भी प्रकाश पर्व पारम्परिक धार्मिक उच्छाव रे साथे मनायो जा रह्यो है। झालावाड जिला रा झालरापाटन अर भवानी मंडी रा गुरुद्वारा मांय खास अरदास अर कीर्तन राख्या गया। हनुमानगढ़ जिला मांय प्रकाश पर्व रे मौके गुरुद्वारा मांय खास कार्यक्रम कर्या जा रह्या है।

000

कार्तिक पूर्णिमा रो पर्व आज प्रदेशभर मांय देव दिवाळी रा रूप मांय मनायो जा रह्यो है। ई मौके सगळा पवित्र तीर्थ स्थान माथे स्नान अर दीपदान समेत दान-पुण्य कर्या जा रह्या है। जयपुर रा गलता तीर्थ माथे सुवारे सूं ई सिरधालूआं रो तांतो लाग रह्यो है। जयपुर अर आरे-सारे रा हलका सूं सिरधालू स्नान खातर गलता पूग रह्या है। बालोतरा मांय खेड़ रा रणछोड़ राय तीर्थ माथे अन्नकूट महोत्सव रे सागे मेळो राख्यो जा रह्यो है। पाली मांय कार्तिक पूर्णिमा माथे केई धार्मिक कार्यक्रम राख्या जा रह्या है। सवाईमाधोपुर रा रामेश्वर धाम रा त्रिवेणी संगम माथे भक्त स्नान कर भगवान चतुर्भुज नाथ रा दर्शन कर्या। चूरू रा सालासर बालाजी मंदिर मांय पूर्णिमा रे मौके खास अनुष्ठान कर्या गया। पुष्कर मांय आज कार्तिक पूर्णिमा रे मौके बड़ी संख्या मांय सिरधालू दान-पुण्य कर्या। प्रशासन ई मौके सुरक्षा रा करड़ा इन्तजाम कर्यो।

000

अंतरराष्ट्रीय ख्याति पायोडो पुष्कर मेळो आज पूरो व्ह्यो। मेळा मैदान मांय राख्या समापन जळसा मांय उपमुख्यमंत्री दिया कुमारी अर जल संसाधन मंत्री सुरेश रावत मौजूद रह्या। जळसा ने संबोधित करता थकां उपमुख्यमंत्री कह्या के तीर्थराज पुष्कर मांय पर्यटन ने बढ़ावो देबा खातर केई विकास काम करवाया जावेला। वे कह्या के ई बाबत अहलकारां अर स्थानीय लोगां सूं सुझाव लिया जावेला। समारोह मांय स्कूली टाबर लोकगीत अर सांस्कृतिक कार्यक्रमां री प्रस्तुतियां दी। इण रे पाछे देसी-विदेशी खिलाड़ियां रे बीच खेलकूद होड़ा व्ही।

000

जयपुर मांय आज सूं आयुर्वेद कुंभ "संयोजनम् 2024" री सुरूआत व्ही। तीन दिन चलबा वाळा इण कार्यक्रम री सुरूआत ऊर्जा मंत्री हीरालाल नागर अर जयपुर सांसद मंजू शर्मा कर्या। ईण मौके एन.सी.एस.एम. रा चेयरमैन जयंत देव पुजारी, राष्ट्रीय आयुर्वेद संस्थान रा कुलपति प्रो. संजीव शर्मा भी मौजूद रह्या। कार्यक्रम ने संबोधित करता थकां ऊर्जा मंत्री कह्या के आयुर्वेद चिकित्सा पद्धति म्हाने जीवन जीबा री कला सिखावे है। वे कह्या के आयुर्वेद री कानी लोगां मांय जाग जगाबा खातर अभियान चलाना पडेला। राष्ट्रीय आयुर्वेद संस्थान परिसर मांय शुरू व्ह्या इण कार्यक्रम मांय देशभर रा करीब तीन हजार सूं बत्ता आयुर्वेद शोधार्थी, डॉक्टर अर शिक्षक भाग ले रह्या है। कार्यक्रम मांय आयुर्वेद सूं जुड़्या नवाचार स्टार्टअप्स अर प्रकृति परीक्षण री जाणकारी दी जा रही है।

000

अखिल भारतीय आयुर्विज्ञान संस्थान-एम्स जोधपुर ने चिकित्सा अनुसंधान अर शिक्षा मांय चोखो काम करबा खातर **बेस्ट एक्स्ट्रा म्यूरल इंस्टिट्यूट** रा ईनाम सूं सम्मानित कर्यो गयो। नई दिल्ली मांय व्ह्या ई कार्यक्रम मांय केन्द्रीय स्वास्थ्य अर परिवार कल्याण राज्य मंत्री अनुप्रिया पटेल एम्स री एकेडमिक डीन डॉ. शिल्पी दीक्षित ने यो सम्मान दियो।

000